

豫章叢書

第卅三冊

豫

章

策

書

卷之四

江南野史卷五

宋 螺川龍 亥 撰

孫忌

孫忌者本名晟山東齊郡人少家貧力學能屬文宋
梁時舉進士會莊宗立號河北方召募河南仕人忌
因亡之署爲著作郎直史館莊宗滅梁隨都洛下迨
明宗嗣位以莊宗蕃漢馬步使朱守殷出鎮汴州辟
忌爲判官遷員外郎守殷猜之性不能自安忌因說
之叛明宗使安重誨攻之城陷守殷伏誅忌乃窘迫
落髮爲桑門將亡淮南時圖像索之頗急至正陽未



濟追騎適至疑之忌乃佯爲捫蝨嚙蟻追者睥睨久之乃去忌方獲渡至旅邸翹坐先主常使親信於淮頭竊覘過客見忌姿儀偉重有異常僧乃走庭下喏之忌端然不答逆者知之乃聞先主使人迎置門下優容禮問忌以實對遂令蓄髮冠帶後從先主渡江署節度巡官彌見親寵每至宴談迨旦迄夕與徐玠同禪禪代擢拜翰林學士知制誥文辭疊順優婉而古尋遷中書侍郎才宏口辨詞說泛濫常爲宋齊邱所忌憚迨嗣主卽位素所畏重累遷右僕射平章事與馮延巳俱相頗有志于重熙富庶燮育疲民時已

下湖南忌白嗣主楚國兄弟自取敗亂其民何罪使
之困瘁欲且解桂林益陽之師以節鉞授劉言使自
矣緝冀惠有衡潭之地則二蕃在我彀中爾延已狠
愎不識大體不然其議未幾劉言果襲取長沙邊鎬
棄城而走忌鄙延已謂人曰玉卮象甌盛內狗彘鷄
樹鳳池棲集梟翟遂求罷相嗣主許之未幾會周師
攻淮甸劉彥貞等全軍陷沒劉仁贍固守壽春嗣主
懼遣忌與王崇質鍾謨李德明相次奉表稱藩請和
周世宗留忌使德明反命請割淮南十四郡以江爲
界朝議不從殺德明遣齊王景達陳覺朱元等救援

壽春與周人屢戰會朱元叛軍遂遁惟仁瞻堅守不下世宗怒江南失約遂引忌責之及話江南事實忌對以兵甲尙強宋齊邱良相也乃致忌於樓車令呼仁瞻趣降忌知終無生還之理不忍負國家恩顧至城下乃反辭大呼曰劉仁瞻汝好固守城池江南救援卽至我遇强暴死在旦夕汝可効死立忠無爲降虜使我羞於泉下左右交擊其口忌顏色自若世宗怒殺之將卽刑整衣冠望南而拜曰臣不忘主恩謹以死謝遂斬之忌家先爲明宗所誅過淮娶蔡婦高氏乃燕公駢之少女無子有隨婦子李紹慶嗣主優

秩以慰之追封中書令魯國公

劉仁贍

劉仁贍者濠州刺史金之次子也少習兵法起家小將性淳謹器度偉重喜怒不形於色總領兵士嚴而不殘有良將之才出典郡符剴治無滯有政績能名軍民樂其仁信詔入爲天威軍都虞候常直宿衛復出鎮江夏長沙之役師舟剌安撫郡邑士民服從入典禁兵甚見親任保大十三年出鎮壽春未數月會前監軍使奏罷冬月沿淮把淺屯戍饋糧仁贍奏以邊境備禦弛廢乞分重兵以防不虞未報周師暴至

城中將校軍吏皆撓懼不知所措仁贍按行城壘分兵指授守據要衝視如閑隙衆心遂定劉彥貞援軍旣至將追周師仁贍固止之曰北人姦詐恐其設伏故宜按甲養銳以俟其隙彥貞性本佻侮不習兵術乃曰賊聞吾至必先遁走所謂縱敵恥也不追則貽患於是奮行果爲所敗自是羣下服其料敵各勵死力以聽任使之命周世宗帥衆四面攻擊仁贍支梧拒守經年不能下遂與裨將破城南大寨斬獲數千級北人大懾又表邊鎬代已守城自帥兵決戰冀定得表嗣主畏懦惟加撫諭不從其表因憤恚而疾其

子謀叛遂命立斬監軍使周構哭而救之亦令併誅
及周世宗樓車載孫忌于城下大呼仁贍曰汝可固
守城隍効死立忠無爲降虜使我羞於地下于是士
卒聞之心堅鐵石仁贍猿臂善射發無不中一旦世
宗親臨城下坐幄中觀戰士攻城仁贍自城上射之
矢去御坐數尺輒墜左右驚愕咸諫請少避之世宗
乃曰一箭射殺一天子天下甯復有天子乎遂命左右
進床坐于墜箭之上矢復至又遠數步而止仁贍知
之因捐弓投矢謂左右曰斯乃天也非我不能中之
我世受國恩兄弟門列榮戟者數人然不能治危扞

敵甯靜邊境貽憂君父吾且恥之今雖病猶能奮力
執戈與諸君背城血戰死于旗鼓之下乃我之分終
不以大丈夫之節屈身以事二姓矣久之世宗駕亦
起仁贍疾彌加不能視事副使孫羽等懼不能謀遂
以城降世宗嘉其忠果使昇至親自慰諭授以節鎮
之任仁贍不起以手指口而卒時日陰暄天雨黃沙
士卒聞之莫不人人銜泣而哭曰上天不仁而使吾
父死也何用生爲自剄者數十人初仁贍歷歲久不
克世宗城淮北爲壽州迫仁贍死乃以故城爲壽春
縣君子曰以周世宗之神武雄斷當矢石而不懼予

觀自古帝王之達者一人而已況太祖太宗躬總元戎而蕞爾彥貞可禦諸乎仁贍出未逾月而淮上兵起其得士卒之心樂爲之用命若非良將又焉致之

陳誨

陳誨者建陽人生而期月足勁能履父母異之小字阿鐵爲人勇敢足膂力長而任俠仕至郡裨將軍中壯之呼爲陳鐵諸軍圍建州誨每出戰前鋒懼之難與爲敵及城陷爲王建封之衆所獲將釋縛斬之自踴出於羣衆執者不能制追之不及乃奔查文徽軍中文徽素已知其驍壯遂以爲小將俾領其舊部招

集亡叛復與潘承佐薦于嗣主以爲劍州刺史及征福州李義誨爲前鋒大破其將馬先進之衆遂遷建州節度使委鎮邊境有吏幹兼治農戰軍民化服及周師入淮甸誨遣長子德誠引卒數千赴難于壽春諸將戰多不利喪失師徒惟德誠出入堅敵未嘗少挫鋒銳班師之日獨賞其軍旌之爲百勝授以和州刺史德誠自少好學才兼文武有能詩名後累刺池虔爲郡有政績故誨之爵位累至同平章事在鎮十數年多薦儒學甄升將校時議多之因疾求罷後主召至建康疾篤親臨其第視問慰勞卽日而卒其諸

第一皆官至顯位焉

鍾謨

鍾謨會稽人徙居建安博學善爲文章嗣主愛之遷自末品寵任異常轉至吏部侍郎謨爲人諂諛佞媚反覆難信復多妬忌及奉使爲周世宗所善使歸論旨乃擅自益加諸潤色常以籙條爲陳覺所排少與李德明親友頗怒覺等樹黨攻之固求北使覆驗覺言嚴續之事往來數四嗣主不能揣悟事理獨任偏辭貶殺覺等覺加元老自謨之始也時議以嗣主使鍾謨覆實而殺覺若使覺覆驗必殺鍾謨也及遷禮

部侍郎知當事主者之在多換其殼權勢危峻克剝
侵官百司之務多出于已李德明之死唐鎬預其謀
至是鎬懼不自安會信州刺史張巒入衛謨素與善
每詣謨第輒屏左右而語或至夜分鎬知其因搆之
及太子冀卒子幼從嘉乃冀同母弟當立謨與第七
子紀公從善同使北朝尤胥優狎頗相稱譽因白嗣
主言從嘉志德俱涼非社稷之寄盛稱從善器度崇
偉真人神之主嗣主由是積怒不已逐于饒州尋殺
之謨始殺陳覺迨唐鎬除謨罪亦見誅不亦可乎

朱元

朱元蒲津人仕本府節度使李守貞爲從事周太祖
輔少主將禪代守貞不從太祖帥師圍之急乃使元
洎李平奉表來乞師嗣主以潤州節度使李金全爲
北面行營招討使與劉彥貞查文徽魏岑等將兵救
之聞其城陷而守貞自焚乃班師因是署元以文資
與平累遷至尙書郎及周師伐淮南諸郡守將皆遁
時元帥萬餘衆克平舒州會元帥齊王景達與監軍
陳覺有隙疑其將叛遂密表請遣元詣濠州議事元
聞命恐爲覺所害將叛其裨將時廷厚不從元殺之
至紫金山將戰遂以所部降于世宗於是諸軍太潰

景達陳覺亦奔還嗣主怒議斬元妻子妻乃查文徽之女文徽屢表雪之誠款懇切嗣主署其表曰只斬朱元妻不殺查家女文徽乃無辭世宗以所叛之眾別作一營以元爲蔡州刺史

江南野史卷六

宋 螺川龍 衮 撰

彭昌

彭昌者其先隴西人也世習儒學爲鄉里所推初唐相牛僧孺其祖遠仕交廣罷秩還至郴衡間爲山賊所剽掠惟僧孺母子獲存遂亡入江南止于廬陵禾川焉迨長爲母所訓遂習先業縣之北有山名絮芋源下有古臺古老傳爲聰明臺其下有湧水曰聰明泉古今學者多於此成業僧孺乃舍其上而肄業迨十數年博有文學會母死遂葬于縣之西南才德鄉